

Dumonda Perl concernent observaziuns ed activitads da detectiv tras persunas privatas

En connex cun la debatta davart la revisiun parziala da la lescha federala davart la part generala dal dretg d'assicuranza sociala (LPGA) èn arrivadas en il focus agenturas da detectivs privatas. Tenor l'art. 43a al. 6 da la revisiun parziala da la LPGA pudessan assicuraders privats numnadamain incumbensar spezialistas e spezialists externs da far observaziuns. Las pretensiuns envers questas spezialistas e quests spezialists na reglass betg la lescha, mabain il cussegl federal.

Ordaifer il context dals fatgs d'assicuranza aveva il cussegl grond dal chantun Grischun concludì – sin proposta da la regenza – da reglar observaziuns ed activitads da detectiv tras persunas privatas cun agid da la participaziun dal chantun Grischun al concordat davart las prestaziuns da segirezza privatas. Plirs chantuns gronds e mesauns n'èn dentant betg sa participads al concordat planisà, uschia che la CDCGP – a chaschun da sia radunanza da primavaira dals 6 d'avrigl 2017 – è arrivada a la conclusiun da betg metter en vigur il concordat prendì en mira.

En vista a la debatta actuala pertutgant la LPGA, ma er cun in sguard sin il naufragi dal concordat, faschain nus las suandantas dumondas:

1. Tge pretensiuns minimalas envers spezialistas e spezialists privats d'observaziun considerescha la regenza sco indispensablas en il context da la LPGA?
2. Co pensa la regenza da reglar observaziuns ed activitads da detectiv privatas ordaifer il champ d'applicaziun da la LPGA en il Grischun?
3. Ha la regenza enconuschientschas davart la dimensiun da l'activitad actuala dals detectivs privats en il Grischun?

Cuira, ils 13 da zercladur 2018

Perl, Cramer, Pfäffli, Atanes, Baselgia-Brunner, Bondolfi, Bucher-Brini, Burkhardt, Cahenzli-Philipp, Cavegn, Caviezel (Cuira), Della Vedova, Deplazes, Dermont, Felix (Scuol), Holzinger-Loretz, Jaag, Jenny, Locher Benguerel, Monigatti, Niederer, Pfenninger, Pult, Schutz, Thöny, Tomaschett-Berther (Trun), Troncana-Sauer, von Ballmoos, Zanetti, Pfister